

西事江略

一
八
冊

西事彙略卷十

迤西陸防各軍總司令部編輯

雜錄

省城軍都督府鈞鑒歌電敬悉出師甯遠以援川此議發於源而定於趙樾老鈞電以道路艱險軍資缺乏爲慮訐謾深遠欽服無似惟樾老曾任永甯習知情勞且親故部曲在彼甚衆於彼中夙有聯絡可爲我應我軍所至必無間阻道險似不足慮資糧於彼亦不虞其匱乏故樾老於此主張尤力已另有電詳陳刻又經派員前往偵察如蒙俞允擬令鍾湘藻或王太潛率一大隊附砲二尊先發支隊長擬就孫劉兩聯長以一人揀任駐榆軍多久屯非計此中關係節經密陳如何之處伏候核奪示遵騰永代表林春華十一人齊日可至遵當以裁汰營數爲首圖彼軍現有廿一營第無論如何均當扼定鈞府所定七營爲限餘如嚴禁攤捐遵守紀律一切條件皆當申明約束俾就範圍此外如有應與訂議事宜乞電示以便遵辦師長根源叩魚印

大理趙樾老李師長鑒月密魚麻兩電均悉謹籌本極贊成惟體察近情尙須商酌頃

接我軍叙府電成都獨立端誅趙遁蒲殿俊爲都督又因放餉被戕仇殺相尋勢益糜爛我軍此時宜先收瀘叙急趨成都爲之掃蕩廓清整理內政恢復治安若取道甯遠似嫌過遲且接會理公呈已經反正而邛雅一帶多爲同志會所分據若專事假道則糧無可因欲節節進攻則多費兵力雖沿途多樾老舊屬然近日地方官勢力已失呼應亦恐不靈又騰永軍甫就範善後尤待經營印公卽行出川西事恐難鞏固愚慮所及輒以奉商卓裁如何仍希賜覆虞印

省城軍都督府鈞鑒虞電奉悉蜀亂至此誠宜疾趨成都不當爲迂遠之圖指示一切尤仰見謨慮宏深惟得彼中近函會理尙未反正匪徒竊發方嚴警備大勢杌隉深冀滇援會理州牧王香余防營管帶董玉書甯遠府王典章打箭爐廳鐘壽康皆藩舊屬鹽邊廳爲藩弟荃鹽源縣趙舒怡亦藩族子又舊部中建昌鎮董南斌最爲忠勇川南巡防統領朱登五現紮犍爲馬邊管帶李光樞與有姻連雅州管帶納汝弼爲阿迷人皆可信倚將吏豫附力足爲助不虞失事軍中給養取辦必易資糧亦非所患偵察所

向雖道路不無險阻尙無他虞至同志會之分據其事雖不能詳就近得消息審彼中情勢似不煩以力取也且取道甯遠爲蜀計固迂第已有一軍由叙直入爲之掃除今以偏師由此道先收建南各屬以爲根據相機進退力不逮則駐守時可乘則濟師建甯一帶邊幅廣而荒廓兵力薄而亂滋我軍填撫亦蜀之利藩等奉電反覆籌商出師計畫何敢不策萬全可否照准前電所陳以鍾湘藻或王太潛先發騰永已就範善後藩當勉任源暫偕往以兵輔之事定後行可從緩議如何之處伏候銜核示遵藩根源謹叩元印

省城軍都督府鈞鑒巧電奉悉鍾王兩大隊已飭準備如期出發槍械水壺飯盒外套等項亦遵飭運省惟志願兵以中學以上學生組織無論素無軍事教育不勝戰陣即山川跋涉艱苦亦非所堪疲憊之餘壯心摧喪始慕從軍之樂繼將怨征戍之苦養之無素客氣固不足恃也此猶論其慵者改革之後建設需材中學以上學生加以淬勵即可備用用之於政界學界或可盡其所長用爲軍人身體弱而思想高轉非所利根

源於此亦深知軍府之用心然推而行之在諸生虧一簣之功在國事無毫末之裨似非得計方今一般言論莫不鼓吹從軍投筆請纓便要榮譽不慮人民無尙武之思想亦無庸再事提倡况武裝國家必有與立一切爲治之具固不能棄而不講胥天下之人出於一道也管見如此可否罷議仍予留堂上課統候衡裁師長根源謹叩胥印省城軍都督府鈞鑒清使議和事關大計囿於邊隅近情難悉惟據粵報粗得梗概又皆一月前事頃得仰光華僑來電甚略第云和議將成條件如何亦不之悉深切懸蔽和議得失利害國中人士言之已詳即南北反正各省莫不主戰無一以和爲可恃尤可覘國民敵愾之心自源言之今日之事兩言而決耳其能去虛位歸大柄以與我共戴共和者餘不難議非此別無可議國民會議其事尤悖今日之革命國民革命非一二入之革命也義聲一唱薄海響應不徵之事實而徵之言論乎彼族計無所之妄冀加入滿蒙行其蠱惑不知平等對待在我特尊重人道不較民族優劣耳就令行其狡謀能以少數限多數平分地而治能自存乎壞我國防能坐視乎此又無待再計者也

屬緩師期有百害而無一利卽謂因而用之不過利兵力之集中而老師糜餉墮我民氣使彼得從容爲備固已不勝其害矣又况爭會地誣簽約反復難信更無與議之價值耶源所知未審所見未必有當然其愚心則第知有鐵血而不知有口舌統一之與共和吾族之死生以之有淪此者當不容有立談之地且彼之違約屢矣聲罪致討與謝外人不患無辭徑當誓師薄伐直搗盧龍掃穴犁庭然後爲最後之解決源牽率在此一切不得與聞北望中原肝膽潰溢憾懣所及不知所裁然大局久而不定慎事何以摺柱訐謨定命尙懇開示至盼根源叩眞印

李師長鑒眞電悉清內閣派唐使到滬議和民軍以戰事延長終傷元氣如果溥儀退位贊成共和自可和平了結提議各條以清帝退位後之待遇清室之年金等爲重民軍皆承認優待乃清廷忽主張民主君主問題取決國民會議又有清帝退位臨時政府亦同時取消之說此則民軍所萬難從者故其餘條件均未議及現在和議決裂戰事已開我軍在固鎮頗獲勝利惟虜勢尙張皖之顓壽三河陝之靈閣潼關皆入敵手

迭接甯電通告滇北伐隊已飭令改道入蜀並擬趨蒙臨開廣國民軍八營繼發合援
蜀軍順流東下出荆襄以截敵攻鄂攻秦之後背川軍亦擬出漢中援西安均有成議
近接遂電段祺瑞通款擬率兵北上促進共和果爾則大局可望早定但未識段究可
靠否虜族反對共和以鉄良良弼等爲最良弼現被炸傷足袁世凱前亦被炸未受傷
內部聞頗軋轢要之虜廷斷無倖存之理惟苟延一日多一日戰禍外族因而生心近
時俄以獨立煽蒙英添兵入藏皆關係大局爲可慮耳此聞餘續電鐫元印

省城軍都督府鈞鑒月密昨接羅總長李次長密電知和議有成北伐軍停止前進代
黔平亂援蜀軍擬駐叙瀘經營西藏竊謂今日之兵不患在少而患在多不患在怯而
患在驕兵多而驕聚於一隅無所用之將紀律無所施而控御窮於術源承乏師中深
睹其害時凜厝火積薪之喻實切綢繆未雨之憂此次北伐軍隊既各挾蹈厲之氣又
未睹暴露之勞氣矜之隆慮不能免果能留黔爲之弭盜力有所注勢可稍紓然黔地
瘠貧難供匱乏轉饟不便久戍實難將來全軍旋滇安置之策務宜預圖援蜀軍經營

藏衛規畫最爲閎遠然必蜀中兵力財力足以共濟或蜀人任轉輸滇軍任開拓此議庶可實行否則因糧於藏殊非萬全倘蜀中內力不充或懷徧見終難相與有成久駐叙瀘益恐妄生猜議此軍人勢尤衆消納尤難根源之愚所爲鯁鯁過慮者也榆軍驕縱已深裁制匪易茲以騰永之事分其勢而輯其心然分駐騰永之軍防範抑制深費心力始得相安於外戰服於內騰事大定即須首謀區處源蒙委任要當勉力圖維藉紓西顧管見所及謹以上陳關於黔蜀兩軍盡籌如何伏冀隨時開示以釋懸蔽根源叩效印

軍都督府鈞鑒竊以財政奇絀用宜求節如府中司務處特以草創之初暫資綜理庶務近聞該處頗滋弊竇人言嘖嘖殆非無因現在各部既設有軍需庶務等員擬請都督府本部亦添設軍需庶務人員經理一切司務處即可裁撤以免煩言而省虛糜是否伏候衡裁師長根源叩皓印

省城軍都督府鈞鑒頃准軍務部來電蒙賞公費銀二千兩源受命以來事變交至負

咎滋多西事雖幸救平要皆上乘宏謨下資群力循涯覽已無可紀錄鈞府寬其督責已切悚慚過示矜隆重滋鹹汗方今財政艱難百度待舉鈞府躬自貶損爲羣倫倡重糜厚糈自居何等且援蜀與北伐諸軍暴露之勞征戍之苦什百於茲下此効命服勤所在多有源亦胡顏之厚而敢獨承將自源始益懼其事難繼張提督文光在騰始事取於公者先後纔四五百金所設闖肆亦用以充軍實方請褒獎以勵廉隅以此方之亦將愧對伏翼收回成命稍釋愧誠至前電預支公帑一千兩因老親前此以騰永之事往返調和及在騰時親族鄉鄰多資飲助負累遂多加以家無餘資稍留供事畜惟源所筭餉銀鉅萬以意取携無以束下具電陳明以重公歛應請仍由薪俸項下陸續歸還庶幾俾源有以自處區區之愚必蒙垂察師長根源叩

李師長鑒三十一電悉公擔西事從事獨賢而太翁往返調和裨益甚鉅卽論酬庸亦分宜然且執事家非素封甯堪復因公虧累希卽收用毋庸固卻又永紳邀留自可暫爲佈置惟檢事亟須整理仍望早日啟行鄂江印

省城軍都督府鈞鑒源弟根漢蒙予咨送留學無任銜戢學費一項昨經陳明自備不
取上累公家頃因源父在騰措資張鎮聞知迄未相謀率爾電請給費洎拍發後始以
稿見示大非源父初意竊根漢得資深造已荷殊施培養子弟本私人分內之事雖在
寒家要當勉力自供方今財政竭蹶何可仰給度支縱軍府逾格曲成亦非源所敢受
經經之意必蒙垂察根源叩冬叩

省城軍都督府鈞鑒各部總次長各司司長公鑒各省當反正以後財政率陷於恐慌
吾滇素號瘠貧專資協濟一自反正協餉遂停以邊瘠之區當艱虞之會外則援川北
伐糧糗竭於軍興內則增兵募團正供耗於郡縣猶能獨力撐拄危疆而百度不匱者
此固鈞府之綱維大部之綜理然爬梳輦弊決塞漏卮若理棼絲而挈綱領以贊襄於
下則財政司陳价之力實多源前筦部務諸資匡弼且該司長所長尤在出納之各裁
制當事計及錙銖但知利歸公家不憚身爲怨府源西行以來每關軍實輒有詰持尤
服其任事嚴正爲不易及茲聞該司長屢請辭職一省度支所在卽一省大命所關實

未可遽行易人致生險象理財之要開源節流慎於今日開源尙未易期節流斯爲先務欲舉節流之實無出該司長右者應請鈞府切詞敦勉力予慰留以維財政至該司所處本艱難之地怨譴之門尤不容有所却顧而求委謝藩等既有見聞不敢引出位之嫌忘大事之急根源乞歸未許力疾備邊尤懼財政恐慌牽動全局敢陳愚慮伏惟垂察藩根源文光叩魚印

軍都督府鈞鑒東電敬悉樾老當代閎哲人望翕然西事決於和平翳惟樾老是賴電召入省贊助具仰旁求至意惟樾老歸志甚堅謝職便難復出懇先予以高等顧問官之職以相維繫庶卽事有漸引退無辭且感軍府之知或回考槃之志如蒙俞允乞卽發布以便促其歸省後卽就徵命入省伏候裁察示遵根源叩冬印

騰越趙樾師鑒頃奉軍府電以吾師閎碩群望所傾公推爲軍都督府高等顧問官用資矜式而脩諮詢並屬歸里省親後早赴省垣飭源轉達云云維西事本末咸欽德化尤於出處之間獨完始終之義軍府優禮不勞職事益符私意源數請解職迄未得報

仰矚高躅悵望何極永事漸有端緒專望吾師蒞臨同行紹三定初八啟程劉聯長已抵榆來電榆事已漸靜定並聞根源叩微印

省城軍都督府鈞鑒師司令部參事張銘前於革命事業南北奔走有年晚歲來滇又以鼓吹學子幾罹顯禍反正後陳請鈞府電召旋滇此次西行延資擘畫尤著勤勞現西事既竣無所資任該參事老成碩望尤不宜以官守相煩擬請委任參議處參議員以爲論思獻納之地如蒙俞允卽屬返省供職伏候示遵根源叩有印

省城軍都督府鈞鑒鈞府二等副官杜韓甫初在日留學東斌學校與楊秋帆悼心國事同時東歸至緬與馬副官幼伯遇遂留仰光從黃克強居覺生黃子和要結同志經營黨事創光華報鼓吹革命最烈後楊君在騰永一帶屬謀舉義皆身預其間革新之機實發於此省城反正之後其功具在洞鑒今隨師西來有所委任尤能不辭勞瘁屢欲加以擢任咸力辭之惟各受光復功章一枚茲見邊局初安國是已定自陳初志擬請仍赴東瀛留學以爲將來效用之地查該員等奔走國難備歷諸艱出入蠻荒十生

九死迨大勳既集成功不居自視退然返而求學志趣高遠尤吾黨所罕觀自應曲遂所請以全其志竊當今民國新造建設需材養成人才實爲先務該員等服務之後退而勤學堅卓刻勵以視餘子所得必多擬懇特沛恩施資送日本留學以示矜式而宏造就學費一項可否由公家籌給出自鈞裁如公帑竭蹶籌撥爲難卽由源與張鎮合力擔任如何之處伏乞衡核示遵師長根源謹叩有印

省城軍都督府鈞鑒代理第七聯長繆嘉壽反正之初備著勞績此次隨師西來一切深資臂助榆聯舊兵退伍尤能不避艱難得以次第就理現在呈請委替經傳鈞府前次電諭飭俟交代後回省到軍械局差據稱粗習軍事欲求深造堅懇於卸事後咨送留學情詞尤切查該員器識通敏才略幹濟歷試其用實淹衆長且於軍事學術亦嘗探其塗轍學習陸軍年齡體質均稱合格與其任以職務程其功於一時尤不若充其學識宏其用於異日又查師司令一等書記官盧鑄前當軍政部初立充任一等編修調赴師中昕夕供事皆於機務殷繁之日深資籌畫襄贊之勞該員資秉瑩越博識多

邇於近世學理既多研求普通科目亦有津逮少年積學實罕等倫專意進修尤殷祈
需如以甘白之質加以陶冶之功必能蔚爲通才培爲國用且時人稍具才智類欲乘
時速化梯榮干進滔滔難返如該員等志趣高遠固已度越尋常且於服務後返而求
學其所造誼必有過人方今需才孔殷作人爲亟然高材得資深造收效尤不可量源
於該員等既念其勤勞尤嘉其精進茲當乞退他無所希猶冀長養人才以儲異日之
用擬請將該兩員送日留學並准給予公費以示逾格裁成如何之處伏乞衡核示遵
師長根源叩有印

大理李師長鑒繆嘉壽盧鏞隨師服務備著勤勞茲復有志求學深堪嘉許惟現時百
政待理可飭其進省以資助助如仍以求學爲急亦可招到省後商酌咨送鐔沁印
永昌由太守轉自治公所侯連三君覽來電悉情殷向學志趨宏遠深爲可佩惟永郡
辦事需才君若遽去餘必相率解體永事尙堪問乎願稍安之源感印

省城軍都督府鈞鑒頃接趙前巡按函稱前打箭鑪知府鍾壽康明達諳練熟習邊情

現丁憂回滬過劍謁見方今人才難得本擬陳請鈞府留滬待用惟該員亟請到滬料理喪事後再行回滇効用函請轉懇予以駐滬調查文報委員差但盡義務不支薪水到滬後調查近事按月報告二次於考察時事不無裨益等語隨據該員到榆來謁才識均有可觀擬懇准予委以駐滬調查文報義務差俾得自効現已飭令晉省上備甄察可否伏候示遵師長根源叩漾印

騰衝黃護道鑒張品高前充保商營管帶事跡遠播東洋喧騰報紙來函稱其才堪小用亦望另委差使如委保商隊長恐貽口實萬萬不宜祈酌之此復總司令元印
省城國民會鑒頃讀貴會發行國民話報辭淺而深聲大而遠昌言無畏足以表我國民之聲敬捐薪俸龍元伍拾元以志欽仰欸由騰寶慶祥匯寄至祈察收李根源叩冬
天津民國報鑒遠辱賜書並惠大報發社會之精蘊挾民族之藩籬恢我黨綱以促群治備邊在外披睹恨遲傾企之情以謝代祝李根源叩

貴州赤水電局探送李旅長鑒來電敬悉雨雪出師遂平黔亂具佩賢勞西事甫就範

圍善後亟待措置擬卽於月杪赴騰爲之整理諸公咸懷遠略分道揚鑣唯源奔走邊
陬碌碌無似爲慚爲羨邇來壯心消盡道念日堅大事稍定當卽解甲逃禪以名山一
席終矣諸公各具偉抱能不薄其願否根源叩馬印

雲南北伐隊唐司令鑒源率師入騰對於騰永軍示以公誠激以大義皆受約束頃嚴
加裁併編爲七營餘十二營均解散遣歸田里所設局所名目紛淆均裁撤騰廳升爲
騰衝府以資控馭并停捐派以紓民力趙樾老偕來已視爭張文光有起義功因請軍
府委任騰鎮并兼統領源雖心力交殫深幸西事敕定知在遠念牽率奉聞惟僻在邊
隅罕聞外事南北近狀乞時電示至盼李根源叩蒸印

貴陽唐都督鑒昨聞黔亂當軸遁亡公被推舉演黔同幸省吾旣任貴提翼廷亦以師
會益慶贊助得人布德抗稜亂勢不足平也宏猷碩畫希時示一二以紓遠蔽西事大
定昨由騰啟行頃抵永昌諸待整飭略有勾留此行內外交託心力俱敝庶事就理卽
當解職歸田用遂初服知注並聞根源叩冬印

貴陽庚總長鑒冬電敬悉莫賡居憂我兄懾行職事賢勞可想尙望切勸莫賡節哀順變以繫群望爲禱根源叩微印

南京司法部次長呂莘農鑒何張諸君素所欽仰推充議員先獲我心昨奉公電當即電呈軍府力贊斯舉諒必樂從君惓惓故土辰告遠猷深佩卓識騰事大定旋師頃抵永昌略爲整飭卽當返省解柄歸田以遂初服同盟分會諸君均乞致意根源叩支印北京參議院張耀曾席聘臣段宇清顧視高四公鑒遙聞北遷計謨定命欣望無似西事敕平引病乞退屢請未許藏事日亟邊備日嚴力疾撐拄益增怵懼邊隅僻遠近事罕聞尙乞時示以開蔽塞根源叩刪印

上海天順祥轉陳筱圃師鑒聞先生至滬欣慰奚深滇事初定咸望師還知吾師瞻臨故國必不忘鄉人之眷眷也源辱門下敢以爲請根源叩江

上海岑西林昆仲安好請轉小圃先生惠書誦悉仁心峻節高識偉論欽服無似民國成立天下幸福滇邦新造亟資羣策能約來公並轡過返慰安桑梓引領以望騰永善